

In amal hual quinmijcuiluilic Pablo in laneltocanjmes hual cataloaya pa colosas, in Colosenses

Pablo quinmijcuiluilía in laneltocanjmes pa Colosas

1 Nehual Pablo niunca se ilanahuatini Cristo Jesús pampa yojque nechlajtultic Dios. Nehual huan točni Timoteo antimijchicahualo. ²Annimitzjicuiluilijtica amhuanten Dios ixolomes hual anquitequipanuilía nepa pa anmocaltilan Colosas, amhuanten hual amo anmocahua pa anquineltochas Cristo. Ma Dios toTajtzin anmitzmaca ilachihualisli cuali huan imosehuilislí pa anmoyolo.

Pablo quilajlanía Dios pa in laneltocanjmes

³Amo timocahualo pa ticsehuisi Dios pampa amhuanten anunca tocnían. Dios yihual iTajtzin toTata Cristo Jesús. Ticsehuilo quiman yes ticlajlanilo yihual. ⁴Unca pampa ticmatije quinami niman míac anquineltocha Cristo Jesús. Huan ticsehuilo pampa ticmatije quinami niman míac anquinlasojla moxtin yehuanten hual cate Dios ixolomes hual quitequipanuililo. ⁵Anquineltocha Cristo Jesús huan anquinlasojla Dios ixolomes pampa amnochixtica pa in tonali quiman anquípías ca yehuanten in hual Dios anmitzpíla pin cielo (ilhuicac) pa

anmitzmacas. Anquimatic inon pa innojen tonaljmes quiman anquicaquic Dios ilajtol melahuac hual unca ilamachiltisli cuali. ⁶In lamachiltisli cuali ajsic capa amhuanten, huan yoje pejtica momachiltía pa mochi in lalticpan. Momiactitalo in lacames hual pejticate yulilo quinami Dios quinequi. Quema, momiactitalo in lacames hual quineltocaticate in lamachiltisli cuali. Unca jan quinami noje panujtica ca amhuanten quiman anquicaquic Dios ilajtol. Umpa anpehuaya anquimati quinami neli Dios quinchihuilía cuali lacames. Huan Dios ilachihualisli cuali unca quinami quinpupuhua inminlajlaculisli. ⁷Quema, Dios tejchihuilía icuali jan quinami anmitznextilic Epafra hual yihual ticnequilo míac. Ca yihual tictequipanuililo Cristo. Ticmatilo quinami cuali tequipanúa Epafra, ticmatilo yihual neli quitequipanuilijtía cuali Cristo. ⁸Noje yihual techmachiltic quinami anlalasoja mochi sejse ca amhuanten, pampa lajtíc pa anmoyolo anquípía in Espíritu Santo hual anmitzlasojlaltía.

⁹Huan pampa inon, pa in tonali hual ticmatije inon anmonahuac amhuanten, yoje tipehualoaya ticlajlanilo Dios huan ticlajlanilo

míac mojmosta pa anquimatis mochi hual len quinequi pa anquichías. Ticlajlanilo ca míac lajlanilisi pa anquimatis inon ca in lajmatilisi hual ticpialo tehuanten huan amhuanten pan ipampa toyolo. Huan ticlajlanilo pa anquimatis len quinequi quijtúa mochi pan ipampa in lajmatilisi pa anmoyolo. ¹⁰Pampín anquimatis anyulis anlanextilijtica pampa anunca lacames hual toTata Cristo huelitijtica pa anmoyolo. Quema, yojque anyulis anquipaquiltitica toTata ca mochi hual anquichía. Pa anquipaquiltis Dios, anyulis anquichijtica mochi hual unca cuali. Yojque anyajtías anquimaztica len quinequi Dios pa anquichías.

¹¹Huan pa anquichías inon, Dios anmitzhueliltis ca mochi ilahueliltilisi, pampa yihual quipía mochi lahueliltilisi. Yojque ca ilahueliltilisi hual yihual Dios anmitzmaca, amhuanten huil anmopepenialtía mochi amo cuali, amo anquinetica anmolacuepilis sinda anmijchihuililo len amo cuali. Huan yojque ca Dios ilahueliltilisi anquipías paquilisi, mas que anmitzpanus len amo cuali.

¹²Ticlajlanilo Dios pa anyulis mochi tonalijmes anquisejtica toTajtzin hual unca pin cielo. Unca toTajtzin hual tejchíac pa ticayasi lachijchihuali pa ticanasi mochi icuali Dios hual huelitijtica capa tehuanten. In cuali cayas inminyaxca mochi ixolomes Dios. Capa Dios huelitía unca quinami mochi unca lahuilisi, pampa ticmatilo pa toyolo mochi hual unca melahuac.

¹³Techquixtic toTajtzin pin polehuilisi capa huelitiaya Satanás. Pan ipampa in laijlaculisi, mochi unca laticumac capa quipía Satanás in lahueliltilisi. Techijcuanic Dios pa camo ticayasi nepa, huan techlalic capa huelitijtica iXolol hual toTajtzin quilasoja míac.

¹⁴Yehuanten quimictije Dios iXolol huan quisac iesli. Unca quinami

techcuhac ca iesli. Yoj techijcuanilía tolaijlaculisi, huan yojque techquixtic pin ilahueliltilisi Satanás. Axcan tolaijlaculisi unca lapujpuhuali.

Unca mosehuilisi pa toyolo pan ipampa quinami Cristo miquic

¹⁵Amaqui huil quita Dios huan amaqui huil quiximati. Ma yoj technextilic Cristo jan quinami unca Dios, pampa yihual unca quinami Dios. Huan Dios hual unca Cristo iTajtzin quimacac Cristo pa yes iyaxca Cristo pa huelitis pa mochi hual quichíac.

¹⁶Pan ipampa Cristo Dios quinchíac mochi hual unca pin cielo (ilhuicac) huan pin lalticpan. Quinchíac len huil tiqitalo huan len amo huil tiqitalo. Quema, quinchíac mochi hual quipialo lahueliltilisi huan in ijyecames hual mochihuanijme amo cuajcuali hual huelitilo yoj huan yoj ca míac ojlimes hual amo moitalo.

Mochi innojen quinchíac yihual Cristo pa cayalosquiaya pa yihual. Cristo quinpías pa yehuanten quichihuilisi len quinequi, huan pa yehuanten lanextilisi quinami yihual unca hué.

¹⁷Huan Cristo yultataya quiman ayamo yec lachihuali nindeno. Yihual quinchihuilía pa camo mocahuasi pa yesi mochi innojen hual quinchíac.

¹⁸Cristo huelitía capa yehuanten hual quineltocalo, jan quinami se itzontecon huelitía pa se icuerpo. Huan yihual in niman hué ca mochi hual huelitilo. Unca iyaxca pa huelitis pa mochi, pampa yihual quipehualtic mochi. Yihual unca in niman hué ca yehuanten hual miquije huan cuaquín yulije oc seja. Yojque unca yihual in niman hué ca mochi. ¹⁹Unca pampa Dios iTajtzin quitac cuali pa yihual iXolol Jesucristo yesquiaya quinami yihual huan pa quipiasquiaya mochi lahueliltilisi quinami yihual.

²⁰Quema, Dios quitac cuali pa

iXolol Jesucristo quichiasquiaya pa yelosquiaya ca mosehuilislí ca Dios mochi hual cate pin lalticpan huan pin cielo. Inon quinequi quijtúa pampa quitac cuali Dios pa iXolol quichiasquiaya pa lacames huan mochi hual cate pin lalticpan yajmo yesi Dios ilacocolinijmes. Huan pampa miqic Cristo pin cuahuil huan quisac iesli, yoje quinchihuilic in mosehuilislí.

²¹ Huan nepa pa yina huan axan amhuanten amo anquinequini anquiximati Dios. Anquijtuni pa anmoyolo quinami Dios ilacocolinijmes pampa amo anmocajtiyahuiaya pa anquichías len niman amo cuali. ²² Ma yoje, axcan anmijchihuilic Cristo pa anyesquiaya ca mosehuilislí ca yihual. Yojque anmijchihuilic nepa quiman miqic. Huan axan anunca ca mosehuilislí ca yihual. Yoje yajmo anmitzitas laijlaculi mas que anquichíac amo cuali. Axan huil anquitequipanuilía yihual san. Huan anmitzitas quinami lacames hual amaqi huil anmitzotexpahuilis ca nindeno huan yoje huil anmitztlalis ilaixpan Dios. ²³ In nicmati pampa anyultía anquineltoacata Cristo. Huan sinda amo anmocahuas pa anquipías mochi anmolaneltoacalislí ca yihual, amo anmijcuanis pa iojli Cristo. Nepa anquichixtlías in tonali quiman anquipías mochi hual len Dios neli anmitzmacas. Yoje techilía Dios ilamachiltislí cuali hual anquicaquic. In yec lamachiltíli ca moxtin hual cate pin lalticpan. Huan nehual Pablo nilapalehuía niclamachiltitica inon pampa nechmaca Dios in tequipanulislí.

Dios quilajtultic Pablo pa quintequipanuilís in laneltocanijmes capa yes moitililo

²⁴ Axan nipanujtica lacocoltilislí pa amhuanten. Pampa in, nicpixtica paquilislí, pampa nipanujtica len

lacocoltilislí pan nocuerpo calica niclantía ca in lacocoltilislí hual panuc Cristo pa in laneltocanijmes, yehuanten hual quineltoacalo Cristo. Yehuanten cate quinami Cristo icuerpo nican pan lalticpan. ²⁵ Nehual niquintequipanuilía yehuanten in laneltocanijmes pampa nechlajtultic Dios pa yojque nitequipanus pa annimitzpalehuis.

Quema, Dios nechlajtultic pa annimitzlamachiltis mochi ilajtol.

²⁶ Pan tonalijmes mochi pa yina huan in tonalijmes hual ajsitihualaloaya pa axan, Dios amo lamacahuilítiaya pa quimatilosquiaya lacames in hual quiipiaya lalatili. Axan unca tolaixpan tehuanten hual ticate ilacames.

²⁷ Quinnextilijtica inon pampa quinequiaya pa quimatilosquiaya ixolomes quinami unca niman hué huan cualtichin inon hual quiipiaya lalatili. Axan Dios quinnextilijtica yehuanten hual amo judíos. Huan inon hual Dios quinnextilijtica unca pampa Cristo yuli lajitic pa amhuanten. Pampa in, anquichixtica pa ajsis in tonali quiman ticpiasi ca yihual mochi in lahueliltislíli cualtichin hual yihual quiipía pa tejxiluilis.

²⁸ Mojmosta tilanahuatijtcate ca ilajtol Cristo. Tiquinmilijtcate moxtin pa lacaquisi pa quimatisi len unca in polehuilislí hual quinpanus yehuanten hual amo quineltoacalo. Tiquinnextilijtcate mochi seje pa monextilisi niman cuali Cristo ilajtol, pa yoje tiquinlalisi moxtin ilaixpan Dios pa yihual quinmitas jan cuali san, pampa cate ca se lajtulislí ca Cristo.

²⁹ Huan pa yoje Dios quinmitas jan cuali san yehuanten, nitequipanúa niman chichahuac. Nimotolintica ca mochi ichichahuilislí Cristo calica nechtequipanultía ca ilahueliltislíli.

2 Niquijtúa inon pampa nicnequi pa anquimatis quinami míac nimotolinía niclajlantica Dios

pa amhuanten huan yehuanten in laneltocanijmes pin caltilan Laodicea, moxtin hual amo quiman nechitaje pa nechiximatilosquiaya. ²Nimotolinía niclajlantica Dios pampa nicnequi pa quipiasi lanequilisli pa quineltocati. Huan quipiasi in lanequilisli sinda cayasi ca jan se lajtulisli. Yehuanten cayasi jan se sinda molasojlasi pa neli quimatisi mojmosta oc se nadita pa inminyolo len quinequi quijtúa Dios ilajtol. Ma molasojlacan pa yoje quimatisi len quinejqujtu mochi. Yojque quimatisi inon hual Dios amo quimacahuiltiaya pa ticmatilosquiaya niman pa yina huan pa mochi xixihuimes hual ajsitihualaloaya pa axan. Axan Dios techmachiltía. Huan techmachiltía pa ticmatisi Cristo ilamachiltisli cuali calica tiqiximatilo. ³Mochi hual monotza pa ticmatisi unca laltili ca Cristo. Yihual quipía la'ajcoquili capa yihual. ⁴Inon annimitzilijtica pa amaqui anmitzcuaquamanas ca lajtomes cuajcualtichin hual anmitzyamanilis anmoyolo pa anquineltocas se lamaxtilisli hual islacati. ⁵Mas que amo niunca nehual umpa ca amhuanten, ma yoje pa noyolo unca jan quinami nicataya umpa. Nicpixtica paquilisli pampa niquita quinami amhuanten anyuli yoje quinami quixtoaca Dios. Huan amo anmochahua pa anquineltocas Cristo ca mía chicahualisli.

⁶Pampa in, xiyultiacan anquineltocati Cristo Jesús toTata jan quinami anpahuac anquineltocac pa innojen tonalijmes hual anpahuac anquicaquic ilajtol. ⁷Xicchihuacan yoje, pampa anmonextilic cuali ilamaxtilisli huan anmonextilijti mojmosta oc se tipichin. Huan mojmosta anquineltoca chicahuac ilamaxtilisli. Xicchihuacan yojque pampa yojque anmitzmaxtic Epafras. Quema, xicmatican niman

cuali Cristo ilamaxtilisli huan xicsehuican míac Dios.

In yulilisli yancuic hual unca pan ipampa Cristo

⁸Ximoitilican pa como anmitzlaneltocaltis se ilamaxtilisli hual nesi cuali huan ma yoje amo unca cuali. Se lamaxtilisli quinami inon amo huil anmitzmaca nindeno cuali pa anmoyolo. Sinda lacames quineltocalo, cuaquín mocuajcuamanalo. Se lamaxtilisli quinami inon unca jan in hual quimaxtilo lacames san. Unca in lamaxtilisli hual quijtulo lajitic pa inminyolo. San quipía nadita ilamaxtilisli Dios huan míac oc se lamaxtilisli hual unca jan ilamaxtilisli in lalticpan san huan amo unca ilamaxtilisli Cristo.

⁹Ximoitilican pa como anquineltocas se lamaxtilisli hual amo iyaxca Cristo, pampa Cristo quipía mochi hual unca Dios chantitica umpa lajitic icuerpo. ¹⁰Yoje, antentica ca iyulilisli Cristo. Anquipía mochi hual monequi pa anyulis ca yihual hual huelití pa mochi in ijyecames hual quipialo lahueliltilisli. ¹¹Anpahuac anquineltocac Cristo huan yoje anmochíac Dios ixolomes pampa Cristo quilalic se lanextilisli pa anmoyolo, jan quinami in judíos mochihualo Dios ilacames quiman quitequilo nadita icuilaxli quinami lanextilisli. Ma yoje, in lanextilisli hual anquipía amo anmijchihuilije lacames ca inminmajmajuan. Cristo anmijchiuilic pa anyes Dios ixolomes pan ipampa in lanextilisli. Yojque anmitzhueliltic pa yajmo anyulis anquichijtica innojen amo cuajcuali hual anmoyolo amo mocahuaya pa quichihualtis anmocuerpo. ¹²In tonali hual ancataya lacuayatequili ca in lanextilisli pa anmoyolo unca quinami ancataya lalalpachuli ca

Cristo huan cuaquín anyulic oc sejpa ca yihual. Mas que Cristo miquic, quiyuliltic Dios ca ichicahualisli. Huan pampa anquimatic inon, yihual anmitzyuliltic yoje ca ichicahualisli. ¹³Huan yojque amhuanten anmiquic pa anmoyolo pampa anquichíac laijlaculisli huan amo anyec lacames hual quitocaje Dios. Amo anquiapiaya Cristo ilanextilisli pa anmoyolo. Ma yoje, Dios anmitzyuliltic yoje yancuic ca Cristo, quipujpuhuac mochi in amo cuali hual ticchihuaje. ¹⁴Yoje, Dios amo techcahua pa timopolusi pampa amo ticneltocaje len quijtúa ilajtol. Unca quinami yihual quijcuanic in amo cuali hual cataya lajcuiluli hual techmotexpahuiliaya tehuanten. In lajcuilulisli quitequihuiaya pa timiquisi. Ma yoje, cataya Cristo hual miquic, amo tehuanten. Unca quinami cataya lasaluli pin cuahuil in lajcuilulisli hual techmotexpahuiliaya tehuanten, jan quinami quisaluje Cristo pin cuahuil. Axcan in lajcuilulisli yajmo huil techmotexpahuilía. ¹⁵Yojque quinquixtilic Cristo in ijyecames amo cuajcuali inminlahueliltisli calica huelitiloaya. Yihual lanextilic inminlaixpan moxtin pampa yehuanten neli amo quipialo lahueliltisli pa techilisi len ticpialo pa ticchihuasi. Inon quichíac pampa quinsulahuac pa in tonali hual miquic pin cuahuil.

Xictemucan quinami anquipías innojen hual cate pin cielo (ilhuicac) pa tehuanten

¹⁶Yoje, amo xicneltocacan amaquic hual anmitzmotexpahuilía pampa anquicua len yes lacuali huan ancuni len yes pa cunis se. Huan amo xicneltocacan sinda anmitzmotexpahuilía pampa amo anquichía fiesta (ilhuil) pan calía yes tonali, quinami in layúa hual nesi in mesli yancuic, huan in tonali hual mosehuilo in judíos. ¹⁷Amo monequi pa

anquineltoacas in lajtomes pampa quiman Dios quinmilic yehuanten pa yina pa camo quicuasi len lacuali, huan pa quichihuasi fiesta (ilhuil) pan se tonali o oc se tonali, san cataya pampa yihual quinmaxtiaya nadita quinami Cristo yahuiaya tejchiphahuili tolaijlaculisli pin tonalijmes hual yahuiaya caya pan lalticpan. Unca quinami ilasehuán (ilasehuayan) se quinextilía nadita quinami nesi in se. Huan jan yoje Dios ilajtol pa yina quinextiliaya ca se lanextilisli hual amo huil tiquitaloaya niman cuali. Quinextiliaya len Cristo yahuiaya tejchihuili quiman hualac. ¹⁸Amo ximomacahuiltilcan pa anmitzilis se pampa amo unca anmoyaxca pa anquimolancuacuetzilía Dios pampa anunca tijtipichin, huan yojque, quil, monequi pa anquimolancuacuetzilis Dios pan inminpampa ilanahuatinijmes pin cielo (ilhuicac). Se hual anmitzilis inon anmijchihuilis pa camo ancanas inon hual Dios quipía pa anmitzmacas. In se quijtúa pampa monextilic innojen ilamaxtilisli pan ipampa len quitemiquic, moita in se quinami se hué. Ma yoje, amo cataya Dios hual quilic in hual anmitzilía in se. Jan anmitzilía in hual yihual ihuán quijtuc lajtic pa iyolo. ¹⁹Se quinami in lacal o sihual amo quitocatica Cristo. Yihual Cristo tiquijtulo unca quinami itzontecon in cuerpo huan in cuerpo unca quinami moxtin hual quineltoacalo. Pampín mochi in cuerpo moscaltis hué pan ipampa ichicahualisli Dios sinda mochías ca se lajtulisli ca Cristo hual unca itzontecon in cuerpo. Se ilajlajco icuerpo salijticate ca ilapantilisli. Huan ilalhuames canaló mochi hual monequi pa quipías pan ipampa itzontecon. Huan pa inminyolo in laneltocanijmes yoje canaló mochi hual Dios quinequi pa quipiasi. Cristo inmintzontecon quinmaca.

²⁰Axan anquimati Cristo miquic. Amhuanten anquineltoaca, huan pampa

in, unca quinami anmiquic amhuanten ca yihual. Yoje, amo anquipías pa anquichías nindeno hual lacames quijtulo pampa monequi pa quichías se pa yoje quipaquiltis Dios. Axan amo anyultica quinami yehuanten pin lalticpan quijtulo monequi pa yulis se. Amo xiquinneltocacan in lajtomes hual quichihualo lacames hual quijtulo quinami monequi pa ticmolancuacuetzilisi Dios. ²¹Nican unca se lanextilisi hual quijtulo: “Sinda se yulisquiaya quinami Dios quinequi pa yulis, cuaquín amo huil quimatoca in, amo huil quilalfá in pa inejnepil, amo huil cana in ca imajmajuan.”

²²Mochi innojen Dios quinchíac pa yoje huil ticchihuasi totequipanulisi huan pa tiquincuasi huan cuaquinon lamilo, yajmo monotzalo len. Amo xiquinneltocacan lajtomes quinami innojen hual amo lapalehuilo nindeno pa se quimolancuacuetzilisi Dios.

²³Yehuanten hual quinneltocalo lajtomes quinami innojen nesilo quinami lacames hual quimatilo niman cuali quinami Dios quinequi pa tiyulisi. Quijtulo sinda yoje mochihualtilo pa quimolancuacuetzilisi míac, Dios quijtus pampa yehuanten niman hué huan oc sequin amo yoje hué. Quijtulo pampa yoje huil quimati se quinami mochías tipichin ilaixpan Dios. Quijtulo sinda se quinneltoca in lajtomes, quicocoltilo icuerpo huan yoje quipaquiltía Dios, huan inon amo unca neli. No, in lajtomes amo monotzalo nindeno, amo quitzacuilía toyolo pa camo quichihualtis tocuerpo in amo cuali hual mojmosta quinectica quichía.

3 Cuaquinon, anquimati Dios anmitzyuliltic pa anmoyolo ca yulilisi yancuic jan quinami quiyuliltic Cristo. Pampa in, xictemucan pa anquimatis in hual Dios quinequi pa anquimatis, hual unca quinami huelitía. Dios axan quipía Cristo

quinami molalijtica pa ima cuali. Yoje lanextilijtica pampa moxtin quipialo pa quimolancuacuetzilisi Cristo jan quinami quimolancuacuetzililo Dios. ²Xiquijnamictiacan inahuac len unca pin cielo (ilhuicac), amo xiquijnamictiacan inahuac len unca pin lalticpan. ³Niquijtúa inon pampa anmocahuac pa anyulisquiaya quinami anyulini pa innojen tonalijmes hual ayamo anquinneltocaya Cristo. Axan lamic in yulilisi. Ma yoje anquipía yulilisi axan hual inahuac inon ayamo anquimati mochi. Unca jan quinami tehuanten ayamo ticmatilo mochi hual inahuac Cristo, mas que amhuanten anyultica ca Cristo capa unca Dios. Axcan, amo lamis anmoyulilisi, unca quinami len hual unca lalatili. ⁴Ma yoje, pan tonali hual nesis Cristo hual techyuliltic ca iyulilisi, cuaquinon noje ca yihual annessis capa Dios huelitía ca ilaixpelalisi cualtichin. Cuaquín anyes quinami Cristo.

Toyulilisi hual tiyulinijme pa yina huan toyulilisi yancuic

⁵Yoje, quinami anquitemujtica pa anquimatis quinami huelitía Dios, xicayacan quinami se mijquil hual yajmo quichía len amo cuali. Ximocahuacan pa anquichías len quichijtialo yehuanten pin lalticpan hual amo quinneltocalo Dios. Amo xiquinmanacan oc sequin sihuames o lacames. Amo xicchihuacan len hual lanextilía pampa anlajtutica amo cuali pa anmoyolo, amo xilajnamiquican yoje. Amo ximomacahuiltic pa len anmitznequiltis pa anquipías len amo unca cuali. Huan amo xiyén (xiyecan) lacames o sihuames hual quinectialo pa quipiasí míac huan míac. Yehuanten hual quichihualo inon cate quinami yehuanten hual quimolancuacuetzililo hual len quinequilo, quinami yesquiaya se

dios. ⁶Amo xicchihuacan yoje, pampa Dios neli quitojtocas ilaixpan pa yesi lacocoltili yehuanten hual yulilo amo quineltoacicate. Quincocoltis pampa quinchihualo innojen. ⁷Amhuanten nojen anyulini anquichijtataya innojen pa yina pan tonalijmes hual anyulini quinami yulilo yehuanten hual amo quineltoocalo toTata. ⁸Huan axcan, amhuanten ximocahuacan noje pa camo anquichías mochi innojen, niqijtrúa, yajmo xicualanican, yajmo xicualantiquisacan, yajmo xicnequican xiquinchihuilican oc sequin len amo cuali, yajmo xilahuejuecaltican, yajmo xilajtucan ca lajtomes amo cuajcuali, yajmo xilacocolican ca lajtomes quinami innojen. Ma camo quisa pa anmocamac nindeno quinami inon. ⁹Amo xislacatican se ca oc se. No, yajmo xicchihuacan innojen, pampa anmoquixtilic in yulilisl hual pa yina catani lajitic anmoyolo hual anmijchihualtitiahuini innojen hual amo cuajcuali. ¹⁰Huan anmolaquitziac ca in yulilisl hual yancuic hual anquipía pa anmoyolo, in yulilisl hual anmijchíac lacames yajyancuic. Dios quichíac in local yancuic huan quichijtrúa pa anajsis anyes quinami yihual pan ipampa in yulilisl yancuic calica neli anquimaztías yihual. ¹¹Sinda quipía se local in yulilisl yancuic, cuaquinon Dios amo moijnamiquía nindeno inahuac quinami cataya, ma ye se hual lacatic pa calía yes lali, ma ye quinami nesi icuilaxli, ma ye da quipía latequili icuilaxli quinami in judíos, o da amo quipía latequili quinami yehuanten hual amo judíos. Dios amo moijnamiquía quinami cataloaya, ma ye quinami quinmitalo oc sequin lacames, sinda quinmitalo huejué o tijtipichin, ma yén (yecan) yehuanten hual amo quimatilo o yehuanten hual quimatilo, ma yén hual yulilo quinami

in yulijquimes cuajleros o yulilo pan calimes cuajcualtichin, ma yén tequipanujquimes o inmintecojuan. No, Dios jan moijnamiquía sinda Cristo yultica lajitic pa iyolo se. Dios moijnamiquía jan inahuac Cristo san, unca yihual san hual monotza mochi.

¹²Anmoquixtilic anmoyulilisl hual anmijchihualtiaya amo cuali. Axcan anuncia amhuanten hual Dios anmitzljaltitlic pa anyes ixolomes. Anmitzljaltitlic pa anquitequipanuilis yihual san, huan yihual anmitznequi. Yoje, xiquinmicnilican oc sequin, xiquinchihuilican cuali oc sequin. Xiyecan quinami lacames tijtipichin. Amo xilachihualtican pa oc sequin quichijtiasi quinami amhuanten anquinequi. Amo ximolacuepilian, ximopepenialtican in amo cuali quiman oc sequin anmijchihuililo amo cuali. ¹³Ximotzacuilican pa camo anquincocolis oc sequin pampa quichihualo lajilaculisl. Huan xicpujpuhuacan quiman yes se ca amhuanten quita len ca oc se ca amhuanten hual quicualantía. Jan quinami Cristo lapujpuhantía, jan yojque xicchihuacan amhuanten noje. ¹⁴Huan mas que anquichía mochi inon, monequi pa anquijnamiquis ca mochi anmochicahualisl pampa anquipía pa anmochías lacames hual quimatilo lalasojlalo. Ximolasojlacan, pampa yojque anmoxtin anyulis jan ca mosehuilisl ca in oc sequin. Inon lanextilisl pampa amhuanten anquimati anyuli jan cuali san. ¹⁵Xiyulican ca mosehuilisl huelitijtica pa anmoyolo. In mosehuilisl anmitzmaca Dios hual anmitznotzac pa jan yoje anyulisquiaya quinami se cuerpo, mas que anuncia míac. Huan xiyén (xiyecan) lacames hual quimatilo yulilo quisejtcate Dios. ¹⁶Ma cajxilti pa mochi anmoyolo Cristo ilamaxtilisl. In anmitzmaca niman míac lajmatilisl pa anquimatis

len unca neli huan melahuac. Ma quinmaxtican mochi seje ca mías lajmatilisli. Ximonequiltican pa anmomaxtis ca mías lajmatilisli. Inon huil anquichía pan ipampa salmos hual cate alabanzas laquixtili pa Dios ilajtol pa tiquinlalilisi latzotzonalisli. Noje huil anquichía pan impampa alabanzas huan cantaditas (cuicames) hual anmitzmaca in Espíritu Santo calica anquinmilis lajtomes huejué pa Dios. Xijcantaruilican (xijcuiquilian) Dios anquisejtica pa anmoyolo. ¹⁷Huan len yes anquijtúa, len yes anquichía, xicchihuacan mochi anquijnamictica pampa yihual huelitjtica pa amhuanten. Pampa inon anquinoxzas ca itoca pa yihual cayas ca amhuanten pa anmitzpalehuis. Xicchihuacan yoje anquisejtica Dios toTajtzin. Unca anmoyaxca pa anquichías inon pan ipampa Cristo.

**Monequi pa in laneltocanijmes
yulisi quinchijtcate innojen pa
inminaltilan huan pa inminchan**

¹⁸Amhuanten sihuames xilamacahuilican pa anmitzlaicanasi anmolahuicalhuan. Unca cuali pa yojque anquichías, pampa anunca iyaxca in Tata Jesucristo. ¹⁹Huan amhuanten inminlahuicalhuan yehuanten, xiquinlasojlapan anmosihuahuan, huan amo xiyén (xiyecan) cualancudos ca yehuanten. ²⁰Amhuanten in xolomes xiquinneltocacan anmotajtzitzián huan ammonantzitzíán. Yoje anquipaquiltía mías in Tata Dios huan yojque anlanextilfa quinami anunca Dios ixolomes. ²¹Amhuanten inmintajtzitzián huan inminantzitzíán, amo xiquinmajmajuatiacan anmoxolomes, pa camo cuajnesi momajtisi o pinahuasi pa quichihuasi len quinchihuilis cuali. ²²Amhuanten tequipanujquimes anquinpía

anmotecojuan nican pin lalticpan. Xicchihuacan mochi hual anmitzilisi pa anquichías. Amo xicchihuacan jan capa anmitzita anquitequipanujtica, quinami jan anquinaquiltiaya lacames san. Xiquinneltocatiacan ca mochi anmoyolo, pa yojque anlanextilfa quinami anquipilía lasojlalisli ca toTata. ²³Huan len yes anquichía, xicchihuacan ca mochi anmoyolo quinami anquitequipanuiljtica in Tata, huan amo jan lacames san. ²⁴Yojque xicchihuacan amhuanten, pampa anquimati anyahui ancana mochi hual quipía in Tata pa anmitzmacas. In monequi pa anquichías pampa anquitequipanuilía toTata Cristo. ²⁵Yojque xicchihuacan pampa aqui hual quichihuilía len amo cuali, yihual panus lacocoltilisli pampa quichihuilic inon, pampa Dios quita se jan quinami quita oc se, ma ye aqui yes.

4 Amhuanten tecojuan, xiquinchihuilican cuali anmotequipanujquimes. Quinami anquichihuilía se, yoje xicchihuilican in oc se. Yoje xicchihuilican, pampa noje anquimati anquipía anmoteco pin cielo.

²Amo ximocahuacan pa anquilajlanis Dios. Xiclajlantiacan quiman yes tiquijnamiquía. Huan quiman anquilajlanía, amo xilatzehuican. Xiquijtutiacan pa anmoyolo in hual anquiljtica, huan amo ximocahuacan pa anquisehuis Dios. ³Huan quiman yes anquilajlantica, xiclajlanican pa tehuanten noje, pa yojque Dios techajxiltis capa huil tiquinlaquetzilisi ilamaxtilisli Cristo. Pa yina Dios ilacames amo quimatinijme cuali len quinequiaya quijtu Dios ilajtol quiman momaxtinijme len quijtuc inahuac Cristo. Axan ticmatilo tehuanten. Huan axan niunca latzacuali pa calijtic pampa niquinlaquetzilijtinemiaya ilamachitilisli Cristo. ⁴Ma yoje,

nicnequi pa Dios nechpalehuis pa niqinlaquetzilis pa yoje niqinmilis moxtin ilamaxtilisli Cristo ca lajtol calica amo moixpolulo yehuante hual quicaquilo, quinami monequi pa nicchías. Pampa in, xiclaflanican Dios pa nechpalehuis.

⁵Ma anmitznextili anmolajmatilisli quinami anyulis cuali quiman anuncia capa yehuante hual amo quineltocalo Cristo. Xiquitequipanucan cuali mochi tonalijmes hual Dios anmitzmacas pa anyulis. ⁶Xilajtutiacan yoje pa anquinmixtocaltis lacames Dios ilajtol. Yoje anyes quinami in istal hual quixtocaltifía se lacuali. Sinda anlajtúa yoje, cuaquinon anquimatis jan quinami monequi pa anquinnanquilis moxtin.

Quinchicahua pampa yahui quilamía iamal

⁷Anmitzilis Tíquico mochi hual nechpanujtica huan quinami niunca. Yihual se točni hual ticlasojlalo míac, huan ticmatilo quinami yihual huil lapalehuía. Huan yihual tictequipanuילו in Tata Jesús. ⁸Annimitztilanilijtica pa yoje yihual quimatis quinami anuncia huan len anmitzpanujtica, jan quinami yihual anmitzmachiltis quinami nehual nipanujtica huan yoje ca in anmitzlacahuáltis. ⁹Yasi huan Onésimo hual unca se točni hual ticlasojlalo, huan ticmatilo yihual amo mocahua pa quitequipanuilis toTata. Yihual se točni hual lacatic pa anmocaltilan Colosas. Yehuante Tíquico huan Onésimo anmitzlamachiltisi mochi hual panujtica nican.

¹⁰Aristarco anmitzpialtía, ca yihual ticate latzacuali pa calijtic nican. Anmitzpialtía noje Marcos hual unca icni Bernabé, icni pa oc se cali. Anmitztilanilije lajtol pa anquimatis quinami anquichihuilis Marcos, sinda umpa huala, xicmosehuiltican. ¹¹Noje

anmitzpialtía Jesús hual noje itoca Justo. In yeyente cate judíos, quipialo ilanextilisli in latequilisli pa inmincuilacli. Jan yehuante san cate in judíos hual ca nehual huan nolajlasojli tequipanujquimes titequipanulo pa ilahueliltisli Dios . Yehuante nechlacahuáltilo míac.

¹²Anmitzpialtía Epafras, yihual lacatic pa anmolali huan quitequipanuifía Jesucristo. Yihual quilajlantía Dios míac ca mochi iyolo, pa yoje amo quiman anmocahuas pa anyulis anquineltocatica Cristo, quinami lacames hual moscaltije ca lajmatilisli. Yoje quimatilo cuali mochi in hual quinequi Dios pa quichihuasi.

¹³Inon niquijtúa inahuac Epafras pampa annimitzifía neli yihual tequipanúa niman míac pa amhuante huan pa yehuante hual quineltocalo Cristo pin caltilan Laodicea huan pin caltilan Hierapolis.

¹⁴Anmitzpialtía Lucas, yihual in lapajtini hual ticlasojlalo, noje anmitzpialtía Demas.

¹⁵Xiquinpialtican tocnían hual quineltocalo Cristo hual cate pa Laodicea. Xiquinpialtican Nimfas yehuante hual quineltocalo hual monechico pa ichan pa quimolancuacuetzilisi Dios. ¹⁶Huan quiman anlamic anquinmomaxtilic in amal anmoyampa anmoxtin, cuaquinon xiclajtultican se pa yihual quinmomaxtilis in amal inminyampa yehuante pa Laodicea hual quineltocalo toTata. Huan amhuante jan yoje ximomaxtilican in amal hual niquntilanilic yehuante pa Laodicea. ¹⁷Huan xiquilican Arquivo pa moiztías pa lamis quichías mochi in tequipanulisli hual quimacac in Tata pa quichías.

¹⁸Nehual niPablo annimitzpialtitica annimajzicuilulijtica nican ca nehual nomajma. Yoje anquimatis pampa mochi in amal unca hual annimitztilanilijtica. Xiquijnamiquican quinami nehual niunca latzacuali pin calijtic. Ma caya ca amhuante in cuali hual san Dios huil annijchihuilía. Yoje ma ye.